



TEZAU LITURGIC

9 IULIE

SLUJBA SF.PREOT-MUCENIC PETRU DE LA CEREVKOV



MOSCOVA, 2000



Служба священномученику Петру, иерею Черевковскому, Красноборскому

НА ВЕЧЕРНИ

На Господи, воззвах: стихиры, глас 4.

Подобен: Дал еси:

Дал еси хваление / Церкви Российстей, Господи,
/ честнаго иерея Петра, / иже Жертву
Безкровную совершая, / чистым сердцем и усты
славляше Тя / и, паству свою непрестанно
словом поучая, / делом утверждаше, / темже
ныне во Царствии Небеснем Тебе предстоит, //
Иисусе Всесильне, Спасе душ наших.

Дал еси образ благочестия / людем Твоим,
Господи, / иерея Божия Петра, / иже во вся дни
жития своего / безкорыстие и нестяжание
являше / и, паче всего нищия и убогия ублажая,
/ смирением себе огради, / темже благодать
стяжа молиться Тебе, // Иисусе Всесильне,
Спасе душ наших.

Дал еси утверждение / людем Красноборския
земли, Господи, / славнаго священномученика
Петра, / иже во дни лихолетия на Руси /
небоязненно враги Церкви и Отечества обличил /
и, храм Божий от разорения ограждая, /
страданий смертных не убоясь, / темже присно

ходатайствует о нас пред Тобою, // Иисусе
Всесильне, Спасе душ наших.

Дал еси знамение / Церкви Твоей, Господи, /
дивнаго во иереех Петра, / иже по мнозех летех
погребения своего, / яко благообразен старец /
во одеяниих иерейских являшеся, / повелевая
панихиды по себе служить, / темже, воистину
знамение Божие преславно бысть, // Иисусе
Всесильне, Спасе душ наших.

Слава, глас 8:

Кое прославление достойное / воздадим ти,
Петре, пастьрю наш добрый? / Ты бо, паству во
благочестии и вере утверждая, / разорители
храма Божия дерзновенно обличил еси / и
страдания люта за Христа приял еси, / сего
ради ныне на Небесех радуешися и веселишися,
/ мзду многу приемля, // и молишися спастися
нам.

И ныне, Богородичен.

Вход. Прокимен дне. Чтения три мученическа
общая:

Тако глаголет Господь: (Ис. 43),
Праведных души в руке Божией: (Прем. 3),
Праведник, аще постигнет скончаться: (Прем.
4).

На литии стихира святому, глас 1.

Подобен: О, дивное чудо:

О, дивное чудо! / Святый Петр сединою и
добродетельми украшен, / венец прияв
победный от Христа, во гробе полагается, / и
многия милости людем от гроба своего являет. /
Веселися, Церковь Русская, / прославляющи
днесь Христова угодника! / Возопиим, вернии, /
иерея-мученика имуще ходатая и молитвенника
ко Господу: / Радуйся, Петре, страстотерпцев
купносельниче, / тобою Господь / подает
мирови // велию и богатую милость.

Ина стихира святому, глас 6.

Подобен: Все отложше:

Врачевство недугов неисцельных / явися
всечестный и чудный гроб твой, / святый
священномучениче Петре! / Ты бо, праведно и
благочестно на земли пожив, / на Небеса
страданьми за Христа возшел еси, / Духа
Святаго сугубою Благодатию исполнився, / по
кончине подаеши просящим с верою исцеления.
/ Ихже и нас сподоби улучшить, святе, //
молитвами твоими.

Слава, святому, глас 6:

Священномучениче Петре, достославне, / ты ни
земля потаила есть, / ни гроб бысть ходатай
забвения твоего, / но Дух Божий яви ты яко

праведника, во веки живуща, / и
чудодейственника непрестанна. / Сего ради
моли Христа Бога // даровати нам велию
милость.

И ныне, Богородичен:

Тебе вси роди человечести / хвальныя дары
приносят, Владычице, / и молятся яко Царице и
Матери Божий. / Пророцы Тя премудро
проповедаша, / левити благословиша, /
апостоли и мученицы исповедаша, /
священницы покланяются, архиереи
проповедают, / монаси и простии благоговеют,
/ богатии и убозии, сироты и вдовы, / и всяк
возраст, и всяко преспеяние, / старческое и
младенческое, / под кров Твой державный с
верою прибегаем: / покрый и соблюди, Госпоже,
молитвами Твоими // и спаси от бед души
наша.

На стиховне стихиры, глас 2.

Подобен: ДOME Евфрафов:

Земле Красноборская, / уделе северный Святых
Руси, / красуйся и ликуй, / се бо пастырь твой
верный Петр // о нас усердно молится.

Стих: Честна пред Господом / смерть
преподобных Его.

О, пастырю Петре, / каменю веры / и
обличителю беззаконий, / Христу верен даже до

смерти пребыл еси, // сего ради ныне прославляеши.

Стих: Священницы Твои оденуты в правду / и преподобнии Твои возрадуются.

Священномучениче Петре, / чудодейственниче благодатию Божиею / и подателю благих, / благую часть подай нам ныне, // молитвами твоими ко Господу.

Слава, глас 5:

Что ты наречем, пастырю наш Петре? / Ратоборца ли, яко силы вражией не убоялся еси, / каменю веры, яко неверныя обличил еси, / мученика ли, яко смерть за веру православную приял еси, / или иерея Божия, яко велико имя Святыя Троицы / служением благоговейным прославил еси. / Сего ради, ныне на Небесех ликуя, // моли спастися душам нашим.

И ныне, Богородичен, глас тойже:

Воспоим, людие, светло давидскую песнь / Отроковице, Невесте Божий и Матери Царя Христа: / предста Царица одесную Тебе, Владыко, рясны златыми одеяна / и преукрашена Божественными благолепотами. / Сию убо, яко избранную и добрую в женах, / паче всего мира удобрив, / благоволил еси родиться из Нея, великия ради милости, / и Сию Помощницу людем Твоим даровал еси / спасти и покрывати от бед / всемогущею

Твоею и Божественною силою, // Еяже
молитвами, Христе Боже, помилуй нас.

Тропарь, глас 4:

Возсиял еси богодарованным тебе чудес
действом, / исповедниче благочестия, Петре
достоблаженне, / ибо благодержновенно обличив
законопреступных ляхов свирепонеистовство, /
страдания многа претерпел еси даже до смерти.
/ Сего ради венцем священномученика /
увенчался еси от Бога, // яко истинный
поборник Церкви Христовы.

Богородичен:

Заступнице Усердная, / Мати Господа Вышняго,
/ за всех молиши Сына Твоего Христа Бога
нашего / и всем твориши спастися, / в
державный Твой покров прибегающим. / Всех
нас заступи, о Госпоже Царице и Владычице, /
иже в напастех и скорбех, и в болезнях,
обремененных грехи многими, / предстоящих и
молящихся Тебе умиленною душою / и
сокрушенным сердцем, / пред пречистым Твоим
образом со слезами, / и невольно надежду
имущих на Тя / избавления всех зол. / Всем
полезная даруй / и вся спаси, Богородице Дево:
// Ты бо еси Божественный Покров рабом
Твоим.

НА УТРЕНИ

На Бог Господь: тропарь святаго дважды. Слава и ныне, Богородичен.

По 1-м стихословии седален, глас 3:

Бысть персть от гроба твоего,
священномучениче Петре, / благодати
исполнена не от земных, но от небесных, / сего
ради людие с радостию взимаху ю // на
исцеление душ и телес.

Слава и ныне, Богородичен:

Людие благочестивии, правовернии собори
христоименитии, / приступите верно вси, /
Божественному припадающе Божия Матере
образу: / Тая бо исцеление болящим радостно
подает, / уязвляет же злославныя, яко стрела от
лука, / нас всех веселит световидно // и
благодатию озаряет, молитвами Своими.

По 2-м стихословии седален, глас 4:

Яко благообразный старец / в светлых ризах
иерейских / многожды людем являлся еси,
священномучениче Петре, / назидая тыя Богу
молитися в недугех и скорбех, // знахари же
отвращатися.

Слава и ныне, Богородичен:

Да ликовствует светло верных все множество, /
рыдает же демонское воинство, / видяще

многоименныя сияющія праздники Божия
Матере, / ублажаемому Божию Матерь
Божественными песнями. / Идеже бо
богоприятно славится / Преплагословенная
Богородица Владычица, Богоизбранная
Отроковица, / неприязни падение, //
христианом же крепкое утверждение.

По Хвалите имя Господне: величание:
Величаем тя, священномучениче Петре, / и чтим
святую память твою, / ты бо молиши за нас /
Христа Бога нашего.

Псалом избранный: Услышите сия, вси языцы:

По полиелеи седален, глас 1:
Радуйся, Красноборская земле, / красно
украшенная пастырем дивным,
священномучеником Петром, / иже во времена
смуты, нестроения и разорения Российския
державы, / яко камень веры и образ
благочестия пастве явился / и небаязненно
противоста врагом Церкви и отечества. / Сего
ради и ныне нам с Небесе, яко истинный
наставник, вопиет: / Русь Святая, храни веру
православную, // в нейже тебе утверждение.
И ныне, Богородичен:
Правоверно чтущия Тя людие, к Тебе
прибегающия / и иконе Твоей святей любезно

поклоняющихся, / о Божия Мати, спаси и не
даждь в расхищение супостатом, / ниже найдут
на ны вся злая, / яже грехи наша уготоваша
нам, / ниже беззакония наша превзыдут на
главы наша, / но да Твоя Матерняя к Богу
преодолеет // за ны богоприятная молитва.

Степенна, 1-й антифон 4-го гласа.

Прокимен, глас 4: Честна пред Господем /
смерть преподобных Его. Стих: Что воздам
Господеви о всех, яже воздаде ми.

Всякое дыхание: Евангелие от Луки, зачало 67.

По 50-м псалме стихира, глас 6

Пастырю наш добрый, / священномучениче
Петре, / положивый душу твою за чада твоя, /
Христу верен даже до смерти пребыл еси, / сего
ради ныне во Царствии Небеснем / блаженство
наследуеши // и молишися о душах наших.

Канон от службы Пресвятей Богородицы ради
Ея иконы Казанския, со ирмосом на 6, и канон
священномученика Петра на 8, глас 2.

Канон священномученику Петру, глас 2:

Песнь 1

Ирмос: Грядите, людие, / поим песнь Христу
Богу, / раздельшему море и наставльшему люди,
/ яже изведе из работы египетския, / яко

прославися.

Господи Боже, / силу подай нам достойно
воспети / подвиги и чудеса пастыря дивнаго,
священномученика Петра, / земли
Красноборския прозябение.

Апостолу Петру воистину тезоименит быв,
священномучениче Петре, / житием бо,
дерзновенною верою и страданием тому
подражал еси / и ныне во Царствии Небеснем с
ним славиши Христа.

Дивно украшенный от юности / сединою
мудрости и житием нескверным,
священномучениче Петре, / благоугоден Богу
был еси и в старости многолетней.

Богородичен: Под кров Твой, Дево Госпоже,
прибегаем, вси роди человечести: / просвети
ны светом Рождества Твоего, грешныя рабы
Твоя, / молящиеся прилежно и кланяющиеся
пречистой Твоей иконе, / просяще от Тебе
приятя великия милости.

Песнь 3

Ирмос: Утверди нас в Тебе, Господи, / Древом
умерщвлей грех, / и страх Твой всади / в сердца
нас, поющих Тя.

Яко истинный пастырь верен был еси Христу,
священномучениче Петре, / словом, делом,
житием и любовию, / от Негоже приял еси

благодать / паству твою в православней вере и
благочестии хранить.

Пресвятую Троицу яко образ жития имея,
священномучениче Петре, / тричастно
прибыток от служения употреблял еси: / на
храм, нищия и на дом твой.

О разорении и умалении Российския державы
скорбя, / молился еси со усердием,
священномучениче Петре, / о еже низложитися
под нозе ея всякому врагу и супостату. / Сего
ради Бог дарова ти благодать противостати
безбожным разорителем храма.

Богорбдичен: Поклоняемся, Богородице, Твоему
пречистому образу и пресладкому Твоему
Младенцу, / превечному и незаходимому Свету,
Христу, / Имже спасла еси от лютых зол и
тления смертнаго все человеческое естество.

Седален, глас 8:

Яко древний мученик, пострадал еси,
священномучениче Петре, / жестоко влачимъ
безсловесным конем, / сего ради в память
вечную, яко праведник просиял еси; /
мучителей же твоих, воистину безсловесия
исполненных // память с шумом погибе.

И ныне, Богородичен:

Божественнии Слова апостоли, / Евангелия
Христова велегласнии вселенныя

благовестницы, / Божественную церковь
создавшие в пресвятое Твое имя, Богородице, / и
к Тебе, Госпоже, приходят, моляще Тя прийти на
тоя освящение. / Ты же, о Богомати, рекла еси:
/ идите с миром и Аз с вами тамо есмь. / Они
же, шедше, обретают тамо на стене церкви
Твоего, Владычице, образа подобие, /
Божественною писано силою шаровными
подобии, / и, видевше, поклонившася Ти и
прославиша Бога. / С нимиже и мы
Божественней Твоей покланяемся иконе, /
просяще от Тебе великия милости: / даруй
согрешений оставление рабом Твоим, Едина
Благословенная.

Песнь 4

Ирмос: Услышах, Господи, / славное Твое
смотрение / и прославих, Человеколюбче, /
непостижимую Твою силу.

Яко предстоятель Российской Церкви святитель
Ермоген, / во дни лихолетия и смуты истинный
защитник Православия явился еси,
священномучениче Петре, / подражая тому и
словом, и делом.

Не терпя, священномучениче Петре, разорение
храма зрети / и ругательство над верою
Православною, / дерзновенно обличил еси
ляхов, яко беззаконных разбойников.

Крепость даде ти, священномучениче Петре,
Христос Подвигоположник Истинный, /
испытати лютая мучения и посрамити врагов, /
хвалившихся безразсудно силою воинскою.
Богородичен: Ты еси похвало и венец святым
всем, о Царице! / Ты упование наше и
Помощница по Бозе, / и на Тя надежду
спасения нашего возложихом вси. / Тебе
молимся, яко Божии Матери: / одожди грешным
рабом Твоим богатая Твоя душеспасительная
милости.

Песнь 5

Ирмос: Света Подателю и веков Творче,
Господи, / во свете Твоих повелений настави
нас: / разве бо Тебе иного бога не знаем.
Законно, яко истинный священник, пожив, /
законно, яко истинный мученик, пострадал еси,
святые Петре, / и ныне во Царствии Божии
благодать имаши сугубую молитися о нас.
По мнозех летех преставления твоего,
священномучениче Петре, / показася гроб твой
от земли одесную олтаря Никольския церкви, /
ты же сам, яко благообразный старец в ризах
священных, являлся еси людям.
В огненном пламени гроб твой,
священномучениче Петре, сохранися, /
знаменуя, яко Божиим Промыслом людям на

исцеление дарован бысть.

Богородичен: Не умолчим никогдаже,
Богородице, псалмы и песньми воспевати
величия Твоя, Обрадованная: / Бога бо
воистинну воплотившагося родила еси, / во
спасение наше всемирное и избавление.

Песнь 6

Ирмос: В бездне греховней валялся, /
неизследную милосердия Твоего призываю
бездну: / от тли, Боже, мя возведи.

Людем, трясавичною болезнию страждущим, /
многожды являлся еси, священномучениче
Петре, / повелевая к твоему гробу припасти и
молитися, / да воистинну исцеление примут.
Иерея черевковского Бориса, / хулившаго
чудеса Божия, от гроба твоего бывшая, /
устрашив, укорил еси, священномучениче
Петре, да покается.

Благодать стяжал еси, священномучениче Петре,
/ духов лукавых прогоняти и целити черную
болезнь, / сего ради мнози страждущия ко гробу
твоему притекаху и злаго недуга свободядахуся.

Богородичен: К Тебе, Госпоже, прибегают роди
правоверных, просят великия милости / и
приемлют неоскудно сущия в недугех исцеление,
в страстях пременение, в печалех утешение. /
Источи и мне, Владычице, каплю

душеспасительную, / да со всеми и аз пою Твое величие.

Кондак, глас 8:

Апостолу верховному тезоименитый / и чудес
действом знаменит явился еси, Петре
преблаженне, / священства бо одежду кровию
мучения испещрив, / на Небеса преселился еси,
исцелений струи источая притекающим к тебе с
верою. / Сего ради вопием ти: / радуйся,
священномучеников купносельниче // и
молитвенниче о чтущих память твою.

Икос:

Аще и в дальнем северном конце страны нашея
/ и в малей веси Черевково, / яко истинный
пастырь потрудился еси, слово Евангелия в
душах верных утверждая, / и тамо, яко мученик
преславный, страдания претерпел еси, святе
Петре, / но ныне вся Российская Церковь тебе
от души вопиет: / радуйся, священномучеников
купносельниче / и молитвенниче о чтущих
память твою.

Песнь 7

Ирмос: Образу златому на поле Деире служиму, /
трие Твои отроцы небрегоша безбожнаго
веления, / посреде же огня, ввержени,

орошаеми пояху: / благословен еси, Боже отец наших.

Даровал еси, священномучениче Петре, / глухим - слух, немым - речь, слепым - зрение, разслабленным - силу, / повелевая овым милостыню творити, овым - во гресех покаятися.

Посрамил еси знахарей, священномучениче Петре, / тщащихся лечити страждущия. / Сие бысть, да познают людие, яко един есть Целитель душ и телес - Христос, истинный Бог наш.

Людем, отступльшим обета своего по исцелении, / паки являлся еси с укорением, священномучениче Петре, / желая тыя к вящему покаянию и исполнению обета призвати.

Богородицей: Неиспытана глубина, неведомо таинство, непостижим образ, Дево, зачатия Твоего, / зачатия без Семене, без мужа рождество. / Безплотный воплотися, Превечный младенствует, / Сын Божий, Сын Тебе, Девы, бывает, Емуже вопием: / Боже, благословен еси.

Песнь 8

Ирмос: В пещь огненную ко отроком еврейским снизшедшаго / и пламень в росу преложшаго Бога, / пойте, дела, яко Господа / и

превозносите во вся веки.

Жену кровоточивую, еле живу сущу, / от
смертныя болезни исцелил еси,
священномучениче Петре, / знахаря же,
врачевавшаго ю, во гресех и лжи обличил еси.
Жена некая, в родах изнемогши, / призва тя на
помощь, священномучениче Петре, яко угодника
Христова, / и абие роди чадо и здрава бысть.
Страждущему недугом падучия болезни,
священномучениче Петре, / дал еси повеление
совершити молебное пение ти и образ твой
написать, / да ведают людие, яко Бог прослави
тя на Небеси.

Богорбдичен: Ты похвала христианом еси,
Владычице, / Ты оружие на враги и стена, / к
Тебе прибегающим. / Тя и ныне на помощь
призываем, Госпоже, / не даждь врагом
вознестися на люди Твоя, / иже Тебе не хвалят,
ни Сына Твоего, Богородице, и Твоей иконе не
кланяются: / сих победы и души наша спаси.

Песнь 9

Ирмос: От Бога Бога Слова, / неизреченною
мудростию пришедшаго обновити Адама, /
ядию в тление падшаго люте, / от Святыя Девы
неизреченно воплотившагося нас ради, /
вернии, единомудренно песнями величаем.
Людие, суще самовидцы множества исцелений,

/ у гроба твоего бываемых, священномучениче
Петре, / яко новоявленного чудотворца
почитаху тя.

Яко столп непоколебим, / бысть часовня твоя,
священномучениче Петре, / озаряючи вся
концы чудес действом. / Сего ради во храм
ныне создается, / да приносится тамо Жертва
благодарения и хваления.

Се время благоприятно, се ныне день спасения,
/ твоя

бо икона, священномучениче Петре, яже многи
леты сокровенна бысть, / обретесе во
утверждение на Руси Православия.

Богородичен: О Всемиловитая христианом
Помощнице, / не может Тя воспети достойно ум
человеческий и ангельский, / яко всея твари
честнейши, Небесных и земных славнейши: /
родила бо еси Творца всех и Бога, / но, о
Владычице, / приими милостивно юже Тебе от
сердца возложихом песнь, / спасай нас всегда,
на Тя бо надеемся.

Светилен:

Людем, сомнящимся, аще Божию волею явися
гроб твой, священномучениче Петре, / столп
светоносный явися возвестити, / яко сие есть
чудо преславно.

И ныне, Богородичен:

Да почитится Всепетая Мати Божия, / Жизнь
Сущую рождши, Христа Бога нашего, / райских
дверей отвержение и всего мира очищение, к
Животу возведение: / Сей есть пророки
глаголавый, / Тому поклонимся, Богу и Спасу
душ наших.

На хвалитех стихиры на 4, глас 5.

Подобен: Радуйся:

Радуйся, священномучениче Петре, / ты бо,
любовию ко Христу уязвився, / вся чуждая
Церкве отвергл еси / и во священный сан
облеклся еси, / Жертву Безкровную
благоговейно многая лета совершая, / сам себе в
жертву живу Христу послежде принесл еси, / и
на Небеса, яко ходатай о нас, возшел еси, //
темже ныне моли спасти души наша.

Радуйся, добрый пастырю Петре, / ты бо, по вся
дни имевый сугубое попечение о людех твоих, /
усердно молился еси о них, / да тихое и
безгрешное житие проживут во всяцем
благочестии и чистоте, / избавльшеся от всякия
нужды и печали, / и Ангела мирна, верна
наставника, Хранителя душ и телес обретше, /
христианския кончины живота сподобятся, / и
добрый ответ на Страшном Судище Христу,
Богу нашему, дадут, // дарующему всем велию

милость.

Радуйся, священный отче Петре, / ты бо по вся дни усердно молился еси Богу / о свышнем мире и спасении душ сродников наших, / о мире всего мира, благостоянии Святых Божиих Церквей, / о святем храме твоём и входящих в онъ, / и о богохранимей державе Российстей, властех и воинстве ея, / о еже избавитися людем российстим иновернаго пленения / и пожити им во временех мирных, / живот же весь Христу, Богу нашему, предати, // подающему всем мир и безмерную милость.

Радуйся, святой иерее Петре, / ты бо ходатая и молитвенника за ны к Богу, / вси вернии людие стяжахом, / подвиги и страдания твоя за Христа прославляюще. / Темже, память твою днесъ светло совершающе, / с верою и любовию тепле вопием: / в Небесных обителях ликуя, / молися Господеви о прославляющих тя, / да дарует нам грехов оставление, / душам нашим спасение, // мир и велию милость.

Слава, глас 8:

О пастырю дивный, священномучениче Петре, / правило веры и образ милосердия в житии твоём явил еси, / в хвалении Господа неумолкавый, / немощныя в вере укреплявый, / унылыя ободрявый, / в подвизех живущия назидавый, / беззаконныя небоязненно

обличивый, / и даже в смертном мучении
прославлявший Христа, Бога нашего, //
подающего мир душам нашим.

И ныне, Богородичен, глас тойже:

Святая Твоя и сообразная икона, Богородице
Дево, / благодатию Твоею пребогатый сущий
источник, / кипящий всей подсолнечней / и
светящий всему миру / светолучными Святаго
Духа сияньми и исцелений светлостьми. / Ты бо
Бога Слова плотию несказанно родила еси, / от
Архангела Гавриила сицевая слышавши: /
радуйся, Обрадованная, Господь с Тобою, / и
Дух Святый осенит Тя к зачатию. / Такожде
рекла еси к первописанной Твоей иконе, на ту
зрящи: / с тою Моя благодать, / и слово Твое со
властию иконе бысть. / И образ, и глас, и сила, и
дело, / и всяк ум превосходящая Божественная
благодать, спребывающи вечно, / знамения и
чудеса непрестанно содевает, / и душеполезное
исцеление всем верно приходящим подает //
Твоими Богоматерними непрестанными к Богу
молитвами.

На литургии

служба священномученика.

Апостол ко Евреям, зачало 334.

Евангелие от Луки, зачало 67.

